



INTERVISTË EKSKLUZIVE me Bardhyl Mahmutin: Si u hoq cilësimi i UÇK-së si “organizatë terroriste”? (21)

PËRFUNDIMI I LUFTËS NË KOSOVË DHE TRANSFORMIMI I LPK-së

FAQE 4-5



Politologu Bardhyl Mahmuti, ish-përfaqësues politik i Ushtrisë Çlirimtare të Kosovës, në intervistën ekskluzive dhënë “Epokës së re”, në vazhdimin e pjesës së njëzet e një, ka folur për përfundimin e luftës në Kosovë dhe për transformimin e Lëvizjes Popullore të Kosovës (LPK). Ai ka theksuar se më 26

qershor 1999 u votua për shndërrimin e LPK-së në parti politike. “Pas këtij vendimi, më 4 korrik 1999 u themelua Partia e Bashkimit Demokratik, ndërsaq më 7 korrik u formuan organet drejtuese të saj”, ka bërë me dije Bardhyl Mahmuti, i cili ka dhënë edhe sqarime për komunikatën e lëshuar nga qyteti Aarau i

Zvicrës, në të cilën theksohej se LPK-ja nuk ka asgjë të përbashkët me Partinë e Bashkimit Demokratik. Gjithashtu, Bardhyl Mahmuti ka folur edhe për reagimet kur dikush përmendte termin “marionetë” dhe “spiun francez” për ish-udhëheqësin e Drejtorisë Politike të UÇK-së, Hashim Thaçi

KRYEMINISTRI I IRLANDËS: ASOCIACIONI TË THEMELOHET, POR JO TË KRIJOHET NJË MIKRO-SHTET

F. 3



RENOVA

PUTZ

Maqedoni
Xhepcisht - Tetovë
Gurëz-Ferizaj

Tel: +389 44 487 300; +389 44 487 009
+389 44 487 755
Fax: +389 44 487 200
Mob: +389 44 501 289

E-mail: renova@mt.net.mk

PRINCESHA

GROUP SH.P.K.

NDËRTIM
PROJEKTIM
SHITJE

INFO: 049-111-101,
044-511-177
www.princesha-ks.com

Bunjamini

FABRIKA E LLAQEVE

044/256-051
044/367-061
028/532-617

MITROVICË

STYROKOL · BUNJAKOL · EUROFASADË

SPORT

RAMAJ REFUZON KOSOVËN E
SQIPERINE, PRET FTESË NGA
GJERMANIA

F. 10

Kolegji BIZNESI

www.kolegjiibiznesi.com
info@kolegjiibiznesi.com
030-500 878 | 045 500 878
044 500 878 | 049 500 878

SIGMA

VIENNA INSURANCE GROUP

SIGMA INTERALBANIAN VIENNA INSURANCE GROUP SH.A
DEGA KOSOVË

Rruga "Pashko Vasa", p.n Prishtinë, Kosovë,
Tel: +381 (0)38 246 301 Fax: +381 (0)38 246 302,
E-mail: info@sigma-ks.net | www.sigma-ks.net

INFINITY

Digital Agency

Endrit Shaqiri
+38344685122

Internet Website,
Marketing...

OPINION

MOS VAJTONI PËR ATA QË
PO IKIN, POR PYESNI VETEN
ÇFARË PO BËNI QË ATA QË
JANË NË KOSOVË TË MBETEN
NË KOSOVË

F. 7

Shkruan: Safet
GËRXHALIU

AKTUALE

BUJAR OSMANI: SUNDIMI I LIGJIT
VARET NGA NISJA E NEGOCIATAVE
ME BE-në

F. 2

90 PËR QIND E PACIENTËVE
TË TRAJTUAR NË KLINIKËN
E ENDOKRINOLOGJISË KANË
QENË ME DIABET

F. 6

EKONOMI

RITET TREGTIA ME PAKICË E
PAJISJEVE INFORMATIKE DHE TË
KOMUNIKIMIT

F. 8

ÇFARË DIHET PËR RASTIN
Ë FATURAVE FIKTIVE NË ATK?

F. 8

ShBA-ja pranon kërkesën e Kosovës për blerjen e raketave kundërtankeve

PRISHTINË, 11 JANAR - Shtetet e Bashkuara kanë pranuar kërkesën e Kosovës për të blerë raketa kundërtankeve, "Javelin", i tha ambasadori amerikan në Beograd, Christofer Hill, presidentit të Serbisë, Aleksandar Vuçiq, gjatë takimit të tyre në Beograd më 11 janar. Departamenti Amerikan i Shtetit do ta dërgojë kërkesën e Kosovës në Kongresin Amerikan, me çka fillon procedura zyrtare, thuhet në komunikatën e lëshuar nga Presidenca e Serbisë. Vuçiqi tha se ky lajm është një zhgënjim i madh, por që Serbia, së bashku me ShBA-në, do të punojnë për ruajtjen e raporteve serbo-amerikane. "Për ne është shumë e rëndësishme që paqja në rajon të mos priset dhe që Serbia të vazhdojë të veprojë në mënyrë të përgjegjshme dhe të kontribuojë në stabilitetin në Ballkan", tha presidenti serb. Radio Evropa e Lirë kontaktoi Ministrinë e Mbrojtjes së Kosovës për këtë njoftim, por nga kjo ministri nuk pranuan ta komentonin këtë zhvillim. Gjatë vitit të kaluar kërkesa për sistemin "Javelin" është rritur. Në uebfaqen e prodhuesit të këtyre armëve, "Lockheed



Martin", thuhet se po dyfishojnë prodhimin aktual "nga 2 100 copë në 3 960 copë në vit deri në vitin 2026", siç janë pajtuar në bazë të kontratës së re me ushtrinë amerikane. Po ashtu, thuhet se 13 shtete në Evropë e përdorin këtë sistem dhe ndër shtetet e fundit janë Maqedonia e Veriut dhe Shqipëria. Ukraina u furnizua me sistemet kundërtanke nga Shtetet e

Bashkuara të Amerikës. Deri në fund të tetorit 2022, ShBA kishte dorëzuar 8 500 raketa "Javelin" në Ukrainë, ekuivalente me prodhimin e saj katërvjeçar.

Armët e tjera amerikane të FSK-së

Forca e Sigurisë së Kosovës, që është në tranzicion për t'u bërë ushtri, edhe më herët është furnizuar me armë amerikane.

Më 2018, pasi Kuvendi i Kosovës mori vendimin për transformimin e FSK-së në ushtri - proces që është paraparë të zgjasë dhjetë vjet - Qeveria e Kosovës kishte nënshkruar një kontratë me kompaninë amerikane "AM General" për pajisjen e FSK-së me 51 automjete të tipit "Humvee". Po ashtu, qeveria kishte blerë edhe automjete të tjera ushtarake nga ShBA-ja më

2020, ndërkaq më 2021 qeveria amerikane i dhuroi Kosovës 55 automjete të tipit ASV (Armored Security Vehicle). Kosova, po ashtu, ka miratuar një vendim për blerjen e dronëve amerikanë, ndërkaq autoritetet e Kosovës kanë paralajmëruar se ushtria e ardhshme do të pajisjet edhe me helikopterë. Përveç armatimit amerikan, FSK-ja është e pajisur edhe me armë të prodhimit turk, sikurse automjete të blinduara ushtarake dhe dronë. Më 2028, kur pritet që FSK-ja të shndërrohet ushtri, ajo parashihet t'i arrijë të gjitha kapacitetet operacionale për, siç është thënë, "ruajtjen e sovranitetit dhe integritetit territorial të Kosovës, si dhe të qytetarëve, pronave dhe interesave të vendit". FSK-ja aktualisht ka rreth 2 500 pjesëtarë. Pas periudhës së tranzicionit, ky numër pritet të rritet në mbi 7 500 dhe të përfshijë pjesëtarë aktivë dhe rezervistë. Në buxhetin e Kosovës për vitin 2024, të miratuar fundin e vitit të kaluar, Ministrisë së Mbrojtjes i është ndarë buxhet në vlerë prej 153.049.911 eurosh.

Bujar Osmani: Sundimi i ligjit varet nga nisja e negociatave me BE-në

SHKUP, 11 JANAR - Maqedonia e Veriut kërkon nisjen e bisedimeve për anëtarësim evropian që të mund t'i arrijë standardet për sundimin e ligjit në vend, respektivisht ngritjen e sistemit gjyqësor për luftimin e krimit të organizuar dhe korrupsionit. Kështu deklaroi të enjten ministri i Punëve të Jashtme i Maqedonisë së Veriut, Bujar Osmani, duke komentuar kritikën e vazhdueshme të diplomatëve perëndimorë në Shkup për ndërhyrjen e politikës në punën e gjykatave dhe për pasojë mosluftimin e krimit të organizuar dhe korrupsionit. Por, Osmani tha se vlerësimi i tij është se "gjyqësori më shumë është i ndikuar nga oligarkët se sa nga politika". "Kjo ndërhyrje është shumë më e rrezikshme se ndërhyrjet politike", u shpreh Osmani duke mos u pajtuar me qëndrimin e diplomatit holandez. Ambasadori i Holandës në Maqedoninë e Veriut, Dirk Jan Kop, gjatë një takimi me kryetarin e Bashkimit Demokratik për Integritet, Ali

Ahmeti, të mërkurën në Shkup tha se "ndikimi i panevojshëm politik mbi çështjet gjyqësore, është i papranueshëm dhe do të shkaktojë reagim të fortë të Holandës". Reagimi i ambasadorit të Holandës pasoi një procedurë që po zhvillohet në Këshillin Gjyqësor, organin më të lartë të gjyqësorit në vend për shkarkimin e kryetares së Gjykatës Supreme, Besa Ademi, e cila kishte hedhur poshtë një nismë për kthimin abolimit apo faljes së ish-zyrtarëve, përfshirë edhe ish - kryeministrin Nikolla Gruevski që ishte miratuar në vitin 2016 nga presidenti atëherëshëm maqedonas, Gjorge Ivanov. Ministri i Punëve të Jashtme, Bujar Osmani, tha se gjyqësori mund të arrijë nivelet evropiane vetëm në rast se nisin bisedimet për anëtarësim në union, por bisedimet janë bllokuar nga Bullgaria për shkak të mosmiratimit të ndryshimeve kushtetuese për përfshirjen e pakicës bullgare në preambulën e saj, si popull shtetformues, ashtu siç

parashihet me një marrëveshje për zgjidhjen e kontesteve mes dy vendeve. "Unë konsideroj se ne nuk mund të arrijmë standarde në sundimin e ligjit pa nisjen e bisedimeve për anëtarësim në BE. Ne mund të flasim për ndonjë standard ballkanik të sundimi të ligjit që mund ta arrijmë edhe vetë, por standardet evropiane nuk mund t'i arrijmë pa nisjen e bisedimeve për anëtarësim. Janë dy procese të lidhura me njëra-tjetrën. Bllokimi i rrugës tonë të anëtarësimit në BE është arsyeja kryesore për mosarritjen e këtij standardi evropian", deklaroi Osmani. Ai tha se me ambasadorin e Holandës kanë pikëpamje të ndryshme sa i përket sundimit të ligjit. "Me ambasadorin e Holandës kemi dy dallime thelbësore në koncepte. Ai konsideron se ne mund të arrijmë standarde për sundimin e ligjit edhe pa bisedime me Bashkimin Evropian. Dikush këtë e lexon si kompliment dhe dikush mund ta vlerësojë si qëllimkeq pasi Holanda është e njohur



për mospasjen e gatishmërisë për zgjerimin e unionit", u shpreh Osmani. Por, nga ana tjetër, reagimi i ambasadorit të Holandës nxiti reagimin e opozitës shqiptare, sipas së cilës kritikën e këtij diplomati janë edhe një "dëshmi për ndërhyrjen e pushtetit në gjyqësor". "Shihet qartë se tani edhe partnerët ndërkombëtarë tashmë e kanë kuptuar mirëfilli se fjalët e BDI-së nuk përputhen me veprimet e tyre dhe manipulimi i tyre është ai që i mban peng qytetarët e Maqedonisë së

Veriut që të jenë pjesë e familjes evropiane", ka deklaruar Izet Mexhiti, përfaqësues i Lidhjes Evropiane për Ndryshim. Gjendja në gjyqësor ishte kritikuar edhe në raportin e fundit të Komisionit Evropian (KE), në veçanti për mungesën e rezultateve në luftën kundër korrupsionit, por edhe me kritika për ndryshimet në Kodin Penal që çuan në vjetërsimin e shumë lëndëve gjyqësore ku ishin të përfshirë ish-zyrtarë të lartë shtetërorë. /REL/

KRYEMINISTRI I IRLANDËS, LEO VARADKAR, KA QËNDRUAR TË MËRKURËN DHE TË ENJTEN PËR VIZITË NË KOSOVË

Kryeministri i Irlandës: Asociacioni të themelohet, por jo të krijohet një mikro-shtet



Kryeministri i Irlandës, Leo Varadkar, pas takimit me homologun nga Kosova, Albin Kurti, ka thënë se ia ka bërë të qartë këtij të fundit se masat ndëshkuese ndaj Kosovës të vendosura nga Bashkimi Evropian duhet të hiqen, si dhe ka theksuar se Asociacioni i Komunave me Shumicë Serbe duhet të themelohet, por nuk duhet të krijohet një mikro-shtet brenda Kosovës. Varadkar ka folur edhe për procesin e dialogut në mes të Kosovës dhe Serbisë. Ai ka theksuar se nuk dëshiron të shohë më skena të dhunës në veri

EPOKA ERE Mal QORRAJ

PRISHINË, 11 JANAR - Kryeministri i Irlandës, Leo Varadkar, ka qëndruar të mërkurën dhe të enjten për vizitë në Kosovë. Ai është takuar me përfaqësuesit e institucioneve, me të cilët ka biseduar për bashkëpunimin mes dy shteteve si dhe ka dhënë mesazhe për institucionet e vendit sa i përket dialogut dhe procesit integruar të Kosovës. Kryeministri Albin Kurti, pas takimit me Varadkar, në një konferencë për medie ka theksuar se është i lumtur dhe i nderuar të jetë sot nikoqir i kryeministrit Leo Varadkar, në vizitën e tij të parë në Kosovë. Kurti ka thënë se Irlanda qëndron si një testament i forcës së unitetit, aleancës dhe angazhimit të qëndrueshëm për përparim. “Zhvillimi ekonomik dhe progresi social në dekadat e fundit e ka bërë Irlandën burim të frymëzimit për shumë shtete. Një pjesë e konsiderueshme e këtyre përparimeve i atribuohen edhe udhëheqjes së kryeministrit Varadkar, duke mishëruar një valë të re ndryshimesh pozitive. Irlanda është veçanërisht frymëzuese për ne, sepse me të kemi ngjashmëri që ne ndajmë. Nga pikëpamja shoqërore, populli

ynë shquhet për ngrohtësinë dhe mikpritjen e tij pavarësisht prej vështirësive që ka përjetuar. Për sa iu përket aleancave ndërkombëtare, të dy shtetet gëzojnë një aleancë të palëkundur dhe lidhje të ngushta me Shtetet e Bashkuara të Amerikës. Ndërkohë që të dy vendet tona janë të orientuara dhe të fokusuara kah rritja thelbësore dhe progresi social”, ka deklaruar Kurti, duke shtuar se Irlanda është mbështetëse e Kosovës për anëtarësim në Këshillin e Evropës. “Ne aplikuaam gjatë presidencës së Komitetit të Ministrave të Këshillit të Evropës nga Irlanda, si dhe për anëtarësim në Bashkimin Evropian për çka kërkuam mbështetjen për statusin kandidat. Irlanda, po ashtu, ka dhënë kontribut të hershëm të cilin e vazhdon edhe sot në fushën e mbrojtjes përmes misionit të KFOR-it në Kosovë. Shteti dhe populli ynë janë gjithnjë falënderues e përgjithmonë mirënjohës. Andaj, takimi i sotëm ishte një rast shumë i mirë për të diskutuar mbi marrëdhëniet tona dypalëshe, për mundësitë që kemi para vetes për t’i thelluar ato, sa në rrafshin ekonomik e tregtar, po ashtu edhe në atë kulturor, politik dhe diplomatik”, ka thënë Kurti. Kryeministri i Irlandës, Leo Varadkar, pas takimit me

homologun e tij nga Kosova, Albin Kurti, ka thënë se ia ka bërë të qartë këtij të fundit se masat ndëshkuese ndaj Kosovës të vendosura nga Bashkimi Evropian për mosshensionim të situatës në veri duhet të largohen. “Masat ndëshkuese ndaj Kosovës duhet të hiqen, këtë ia kam thënë edhe kryeministrit. Dua që Asociacioni i Komunave me Shumicë Serbe të themelohet, por nuk duhet të krijohet një mikro-shtet brenda Kosovës. Kjo nuk do të jetë e dobishme për të ardhmen”, ka thënë ai në një konferencë për medie bashkë me kryeministrin Kurti. Varadkar ka theksuar se shteti i tij është një nga vendet e para që ka njohur pavarësinë e Kosovës në vitin 2008 dhe se është shumë krenar për kontributin e ushtarëve irlandezë që janë pjesë e KFOR-it në Kosovë. “Kurti dhe unë pajtohemi që e ardhmja e Kosovës është në Bashkimin Evropian dhe në Këshillin e Evropës dhe do ta përkrahim Kosovën që të bëhet anëtare e KE-së sivjet dhe të fillojmë edhe procesin e negociatave me Bashkimin Evropian për anëtarësim”, ka potencuar kryeministri irlandez. Ai ka thënë se shpreson që ky të jetë viti kur Kosova do të bëhet anëtare e Këshillit të Evropës. “Irlanda është një model për ta

ndjekur dhe mund të punojnë në këtë drejtim së bashku”, shtoi ai. Varadkar ka folur edhe për procesin e dialogut në mes të Kosovës dhe Serbisë, derisa ka theksuar se nuk dëshiron të shohë më skena të dhunës në veri. “Dialogu në mes të Kosovës dhe Serbisë është jetik për të arritur një harmoni dhe për të pasur një zhvillim të dyjave vendeve. Sivjet duhet që ky stabilitet të konsolidohet. Nuk dua të shoh skena të dhunshme që i pamë gjatë muajit shtator”, është shprehur ai. Kryeministrin e Irlandës e ka pritur në takim edhe presidentja Vjosa Osmani. Presidenca ka njoftuar se në takim u diskutua për zhvillimet aktuale politike dhe të fushës së sigurisë, interesat e përbashkëta dhe zgjerimin e mundësive për rritjen e bashkëpunimit. Me këtë rast u rikonfirmuan marrëdhëniet e shkëlqyeshme ndërmjet Kosovës dhe Irlandës, teksa presidentja Osmani falënderoi kryeministrin Varadkar për mbështetjen e palëkundur në përpjekjet e vazhdueshme të Kosovës për paqe të qëndrueshme, stabilitet dhe zhvillim ekonomik. Osmani shprehu mirënjohje për mbështetjen e Irlandës në rrugëtimin e Kosovës drejt anëtarësimit në Këshillin e Evropës. Më tutje, ajo theksoi rëndësinë e vazhdimin të kësaj mbështetjeje drejt anëtarësimit final në Këshillin e Evropës, BE, por edhe në organizata ndërkombëtare. “Anëtarësimi në Këshillin e Evropës është në dobi të të gjithë qytetarëve të Kosovës dhe mundëson

mbrojtje të avancuar të të drejtave të njeriut”, ka thënë presidentja Osmani. Më tej, Omani ka theksuar se është koha që edhe raportet e Kosovës me BE-në duhet të ngrihen në nivel tjetër. “Kosova e meriton statusin e vendit kandidat. Kosova mishëron vlerat evropiane, ndaj në këtë frymë ka pasur angazhim të vazhdueshëm që legjislacioni ynë është në harmoni me ligjet e BE-së. Është momenti i duhur që ta marrim statusin e vendit kandidat”, është shprehur presidentja Osmani. Në raport me zhvillimet e fundit në vend, presidentja Osmani theksoi se Kosova tashmë ka bërë hapa përmbyajtësorë për shpërkallëzimin e situatës në veriun e vendit, ndaj i cilësoi masat e BE-së joproporcionale dhe në dëm të qytetarëve të Kosovës. Në këtë kontekst, Osmani shprehu mirënjohje për qëndrimin e Irlandës kundër këtyre masave dhe përsëriti thirrjen për heqjen e tyre, ngaqë masat aktuale në fuqi kundër Kosovës janë të padrejta dhe krijojnë mungesë ekuilibri në dialog. Kurse sa i përket situatës së sigurisë, Osmani tha se mungesa e masave kundërt Serbisë në lidhje me sulmin terrorist dhe aktin e agresionit të 24 shtatorit në Banskjë vetëm se e inkurajon atë për të bërë sërish veprime të ngjashme, që cenojnë jo vetëm stabilitetin e Kosovës, por edhe rajonin. Osmani dhe Varadkar theksuan rëndësinë e bashkëpunimit në adresimin e sfidave globale dhe nxitjen e zhvillimit në të gjitha sferat e interesit të përbashkët, me fokus të veçantë në fushën e arsimit dhe shëndetësisë.



INTERVISTË EKSKLUZIVE me Bardhyl Mahmutin: Si u hoq cilësimi i UÇK-së si “organizatë terroriste”? (21)

Përfundimi i luftës në Kosovë dhe transformimi i LPK-së

Politologu Bardhyl Mahmuti, ish-përfaqësues politik i Ushtrisë Çlirimtare të Kosovës, në intervistën ekskluzive dhënë “Epokës së re”, në vazhdimin e pjesës së njëzet e një, ka folur për përfundimin e luftës në Kosovë dhe transformimin e Lëvizjes Popullore të Kosovës (LPK). Ai ka theksuar se më 26 qershor 1999 u votua për shndërrimin e LPK-së në parti politike. “Pas këtij vendimi, më 4 korrik 1999, u themelua Partia e Bashkimit Demokratik, ndërkaq më 7 korrik u formuan organet drejtuese të saj”, ka bërë me dije Bardhyl Mahmuti, i cili ka dhënë edhe sqarime për komunikatën e lëshuar nga qyteti Aarau i Zvicrës, në të cilën theksohej se LPK-ja nuk ka asgjë të përbashkët me Partinë e Bashkimit Demokratik. Gjithashtu, Bardhyl Mahmuti ka folur edhe për reagimet kur dikush përmendte termin “marionetë” dhe “spiun francez” për ish-udhëheqësin e Drejtorisë Politike të UÇK-së, Hashim Thaçi

PRISHTINË, 11 JANAR-

“Epoka e re”: Pak përpara përfundimit të luftës, organet drejtuese të LPK-së vendosën ta shndërronin pjesën e kësaj organizate që vepronte në Kosovë në parti politike. Edhe pse pati një proces të tërë rreth kësaj çështjeje, transformimi i saj në parti politike nuk u përkrah nga të gjithë veprimtarët e saj. Ku ishin arsyet e divergjencave që sollën deri te refuzimi nga një numër veprimtarësh t’i pranonin rezultatet e Mbledhjes së Përgjithshme që u mbajt në Prizren në qershor të vitit 1999?

Bardhyl Mahmuti: Duke qenë në rrjedha të zhvillimeve të bombardimeve të caqeve të forcave serbe dhe iniciativave diplomatike për t’i imponuar Slobodan Millosheviqit që t’i

pranonte kushtet e vëna për ndërprerjen e luftës, më 22 maj 1999, Këshilli i Përgjithshëm i Lëvizjes Popullore të Kosovës vendosi t’i kërkojë mendimet e strukturave të saj (nëndegëve,

këshillave të rretheve dhe këshillave popullorë) lidhur me një varg çështjes, në mesin e të cilave edhe mendimin për transformimin e kësaj organizate në parti politike.

Në përputhje me përgjigjet që morën nga strukturat e organizatës u formua grupi i punës që do ta përgatiste Mbledhjen V të Përgjithshme brenda vendit në përbërje të të cilit ishin Ali Ahmeti, Ibrahim Kelmendi, Ramadan Avdiu, Halil Selimi, Xhevat Bislimi, Mehmet Bislimi dhe Ramiz Lladrovci, ndërkaq Bedri Islami, Hasan Ukëhaxhaj dhe unë u ngarkuam ta koordinonim veprimtarinë me Qeverinë e Përkohshme.

Pas takimeve konsultative me veprimtarët e LPK-së në Kosovë dhe mbledhjeve konsultative në Prishtinë dhe Prizren, më 26 qershor u mbajt Mbledhja V e Përgjithshme e LPK-së në Prizren. Me 1 votë kundër dhe 4 abstenime, delegatët që ishin të

pranishëm votuan për shndërrimin e LPK-së në parti politike.

Pas këtij vendimi, më 4 korrik 1999, u themelua Partia e Bashkimit Demokratik, ndërkaq më 7 korrik u formuan organet drejtuese të saj.


“Epoka e re”: Në mbledhjen themeluese të partisë ju u zgjodhët kryetar partie, z. Jakup Krasniqi nënkryetar, ndërkaq z. Shaban Shala sekretar i përgjithshëm. Çfarë ndodhi me kryetarin e deriatëhershëm të LPK-së, z. Bedri Islami?

Bardhyl Mahmuti: Në momentet më të rëndësishme të luftës çlirimtare, Bedri Islami ka qenë kryetar i organizatës dhe, falë urtësisë së tij, gjërat kanë shkuar ashtu si duhej. Është e habitshme energjitë intelektuale dhe fizike që ka poseduar ky njeri në atë kohë. Përveç takimeve të rëndësishme për rrjedhat e luftës, ai ka shkruar disa qindra artikuj dhe fjalime për ta arsyetuar domosdoshmërinë e luftës çlirimtare dhe për t’i mobilizuar mërgimtarët ta përkrahnin këtë luftë. Për arsye personale ai vendosi të mos jetë kandidat për udhëheqës partie. Nëse do ta shprehte dëshirën ta vazhdonte udhëheqjen e strukturës sonë, jam i bindur se do ta fitonte besimin e shumicës. Unë do të votoja për të!

2. Është hedhur mendimi për shndërrimin e LPK në një parti politike shqiptare, që mbrohet denjësisht interesat kombëtare. Ky mendim nuk ka lindur vetëm në radhët e organizatës, por edhe në qarqe të tjera, me të cilat ka bashkëpunuar organizata jonë. Shndërrimi i saj në parti politike, me nishikimin e programit pa hequr dorë nga përcaktimet kombëtare të tij, me nishikimin e statutit, duke u mbështetur në atë ekzistues, me përcaktime të qarta për pavaresinë e Kosovës dhe bashkimin kombëtar si çështje e shtruar për zgjidhje do t’i bëjë që në skenën politike të Kosovës të ketë një parti rreth së cilës mund e duhet të mbledhen njerezit e përkushtuar ndah çështjes kombëtare.

“Epoka e re”: *Një javë më vonë, më 11 korrik 1999, në emër të Kryesisë së Nëndegës së LPK-së për Zvicër, u lëshua një komunikatë nga qyteti Aarau i Zvicrës, nëpërmjet së cilës deklarohet se LPK-ja nuk ka asgjë të përbashkët me Partinë e Bashkimit Demokratik dhe se kjo organizatë do ta vazhdojë veprimtarinë për arritjen e misioneve të veta. Si e keni parë këtë komunikatë në atë kohë?*

Bardhyl Mahmuti: Edhe pse kam qenë në dijeni se prapa shkrimit të asaj komunikate nuk ka qëndruar kryesia e Nëndegës së LPK-së për Zvicër dhe as nënshkrimi i sekretarit të saj (sepse Xhevat Kabashi ka qenë në Kosovë, së bashku me Ramadan Avdiun, Murat Bytyqin dhe Muharrem Elshanin), ne nuk kemi reaguar. Ka qenë plotësisht e mundshme që ndonjëri prej tyre të ketë qenë kundër transformimit të LPK-së në parti politike, madje Muharrem Elshani ka qenë i vetmi delegat në Mbledhjen V të Përgjithshme që ka votuar kundër. Mirëpo ishim të bindur se cilësimi që u bëhej “disa anëtarëve të Degës së LPK-së si karrieristë të sëmurë të cilët mendojnë se edhe LPK-në e kanë lodër për sëmundjet e tyre karrieriste” nuk mund të vinte nga Murat Bytyqi, Ramadan Avdiu apo Xhevat Kabashi.



“Epoka e re”: *A e dini se kush e ka shkruar këtë komunikatë?*

Bardhyl Mahmuti: Po! E dimë edhe kush e ka shkruar edhe kush e ka shpërndarë nga Cyrihu. Nuk e shoh të udhës t’ua përmend emrat. Ai që e ka shpërndarë komunikatën nga Cyrihu ka qenë një atdhetar i madh dhe veprimtar i shquar për çlirimin e vendit dhe pa marrë parasysh që nuk është pajtuar me proceset që janë zhvilluar në atë kohë, unë ruaj respektin për të!

“Epoka e re”: *Pse nuk reaguat?*

Bardhyl Mahmuti: Nuk e kemi parë të udhës ta mohojmë të drejtën e atyre që mendonin se duhet ta ruanin vazhdimësinë e LPK-së për t’i realizuar misionet në territoret e pushtuara nga Serbia në Luginë të Preshevës, në Maqedoni dhe në Mal të Zi. Asnjëherë nuk i kam dhënë vetes të drejtë t’i mohoj dikujt të drejtën të veprojë edhe në emër të asaj organizate, pjesë e së cilës kam qenë.

“Epoka e re”: *Ata që ju akuzonin se i keni larguar nga udhëheqja e organizatës nëpërmjet “puçit” që keni bërë në Mbledhjen VI të Përgjithshme të LPK-së Dega Jashtë Vendi, nuk njohën*

procesin e transformimit të LPK-së në parti dhe garuan për pushtet në Kosovë. A ju ka shkuar ndër mend t’i akuzoni se kanë bërë “puç” kundër Mbledhjes V të Përgjithshme që u mbajt në Prizren?

Bardhyl Mahmuti: Komplotet karakterizohen me aksione të fshehta të kryera nga individë apo grupe me qëllim që të bëjnë dëm, dhe gjatë historisë ka pasur komplete që hulumtimet kanë nxjerrë në pah detajet se si janë organizuar dhe kryer ato. Mirëpo, në politologji teoria që përpiqet t’i shpjegojë rrjedhat shoqërore nëpërmjet komplotit konsiderohet si një çati ku përpiqen të strehohen ata që nuk kanë mjete të tjera teorike për t’i shpjeguar gjërat. Unë jam politolog dhe në asnjë rast nuk mendoj se ata që kanë vazhduar LPK-në kanë pasur qëllim të keq. Është çështje tjetër se sa kanë ditur t’i realizojnë misionet për të cilat janë përcaktuar. As nuk i kam kritikuar dhe as i kam quajtur “karrieristë të sëmurë” kur kanë garuar në zgjedhje në emër të LPK-së, as kur janë transformuar në Parti Socialiste, as kur e kanë zhbërë Partinë Socialiste pas dështimit në zgjedhje. Nëse Partia e Bashkimit Demokratik “nuk ka pasur asgjë të përbashkët me Lëvizjen Popullore të Kosovës”, siç deklaroheshin nëpërmjet komunikatës së lartpërmendur,

asnjë vërejtje të vetme rreth angazhimeve të tyre në këto dy luftëra! Përkundrazi kanë vetëm mburrje! Ata harrojnë gjënë thelbësore në angazhimet politike: rezultatin final! Nëse ne “puçistët” bëme “komplot” kundër tyre për ta marrë në duar udhëheqjen politike të luftës çlirimtare në Kosovë, ndërsa ata kishin “duart e lira” të udhëhiqnin luftën në Luginë të Preshevës dhe në Maqedoni, do të ishte mirë t’i shihnin rezultatet! Kur shoh gjendjen e shqiptarëve në Luginë të Preshevës, si popull më i shtypur dhe më i diskriminuar në Evropë, dhe kur shoh që të drejtat e shqiptarëve autoktonë në trojet e veta nën Maqedoni përcaktohen me përqindjet e manipuluar, atëherë nuk më vjen keq të deklaroj publikisht se shyqyr që nuk kanë fituar besimin e delegatëve të Mbledhjes VI të Përgjithshme të LPK-së Dega Jashtë Vendi, sepse ka pasur rrezik që rrjedhat të merrnin drejtime të padëshiruara. Në vend që të vazhdojnë me akuza kundër “puçistëve” që i larguan nga drejtimi i organizatës në maj të vitit 1998, do të ishte mirë të jepnin sqarime për veprimtarët e devotshëm nëse shuarja e “LPK-së së tyre” nënkupton se kanë realizuar misionet politike të Lëvizjes



përmasave të gjera nga ata që shihnin gjithkund “komplot” dhe kaloi caqet e divergjencave individuale. Prandaj nuk po ua përmend emrat. Por, siç thotë një shprehje popullore, “kush është Bektesh e merr vesh”! Në këtë kontekst e pashë të udhës të sqaroj për opinionin publik shqiptar se prapa emrit “Pierre Syrami” nuk qëndron asnjë shëf i Shërbimit Francez, por bëhet fjalë për pseudonimin e Maurice Dufresse, një ish-zëvendësdrejtor teknik, i pensionuar për “çështje shëndetësore” dhe i cili ka botuar një libër, ndaj të cilit janë ngritur disa padi për shpifje! E pashë të udhës të sqaroja se në librin e tij autorial “Dëshmia e Pierre Siramy-t, 25 vjet në shërbimet sekrete”, në 793 faqe të shpërndarë falas përmes internetit, nuk e gjen as dhe një fjalë të vetme për Hashim Thaçin! Sipas mendimit tim, është e turpshme kur, për inate personale, bashkëveprimtarët e dikurshëm përhapin shpifje të tilla!

“Epoka e re”: *Megjithatë akuzat për “marioneta të shërbimeve sekrete” nuk kanë pushuar as sot e kësaj dite!*

Bardhyl Mahmuti: Pavarësisht prej dëshirës së atyre që synojnë të krijojnë huti, njerëzit nxjerrin konkluzione në bazë të rezultateve. Nëse “marionetat e shërbimeve sekrete” arritën ta drejtojnë politikisht luftën dhe ta çlirojnë Kosovën, ndërkaq përpjekjet e “anëtarëve të devotshëm të LPK-së anembanë globit” nuk arritën t’i çlirojnë territoret shqiptare të Luginës së Preshevës dhe në Maqedoni, atëherë diçka nuk është në rregull me koherencën e tyre!

“Epoka e re”: *Për aq sa kemi dijeni, LPK-ja vazhdon ekzistencën e saj.*

Bardhyl Mahmuti: Nëse përdorim gjuhën e komunikatës që është përdorur kundër Partisë së Bashkimit Demokratik, atëherë mund të themi se shpërbërja e Partisë Socialiste të Kosovës që pretendonte se ishte vazhdimësi e LPK-së u bë nga ata që këtë organizatë e kanë konsideruar me logjikën e “lodrës”. Mirëpo ka veprimtarë që nuk janë pajtuar me këtë rrjedhë të ngjarjeve. Edhe sot e kësaj dite Murat Bytyqi përpiqet ta mbajë gjallë organizatën me emrin LPK. Murat Bytyqi është një veprimtar i shquar i çështjes kombëtare, me të cilin kemi qenë në burgun e

Pozharevacit dhe ndaj të cilit ruaj respektin që e kam pasur gjithmonë.

“Epoka e re”: *A e dini se çfarë bëjnë konkretisht veprimtarët që kanë vazhduar veprimtarinë në kuadër të LPK-së?*

Bardhyl Mahmuti: Aspiratat që ishin shtruar në platformën politike të Lëvizjes Popullore të Kosovës nuk janë realizuar tërësisht as sot e kësaj dite. Me kapacitetet që kanë, ata përpiqen të mbajnë gjallë këtë frymë. Po ju jap një shembull konkret. Pas agresionit serb në Banjskë, Murat Bytyqi organizoi një takim me veprimtarë të dalluar të çështjes kombëtare me qëllim që t’i ndanin shqetësimet me situatën e krijuar dhe të bashkërenditeshin veprimtaritë në interes të Kosovës. Isha i ftuar edhe unë. Për shkak të gripit që më kishte rënë nuk munda të shkoj, përndryshe do të merrja pjesë.

“Epoka e re”: Disa muaj pas themelimit të Partisë për Bashkim Demokratik ju u bashkuat me pjesën tjetër të Drejtorisë Politike për ta themeluar Partinë për Prosperitet Demokratik të Kosovës, e cila në Kuvendin e Parë Zgjedhor mori emrin Partia Demokratike e Kosovës.

Bardhyl Mahmuti: Dëshëm apo nuk dëshëm, qëndrimi i disa anëtarëve të LPK-së ta vazhdonin realizimin e misionit të kësaj organizate me të njëjtin akronim na vinte në pozitë që ta arsyetonim vazhdimisht legjitimitetin e lindjes së Partisë për Bashkim Demokratik. Në këtë kontekst, një numër drejtuesish të partisë ishin të mendimit se duhej të bashkoheshin rreth një partie politike të gjitha forcat dhe veprimtarët që kishin mbështetur luftën çlirimtare. Fryma e bashkimit dominonte gjithkund në radhët tona dhe, si rezultat i kësaj fryme, më 12 tetor 1999, së bashku me Hashim Thaçin, nënshkruam deklaratën e bashkimit politik për t’i dhënë fuqi një force të përbashkët politike. Është e habitshme se pikërisht ata që nuk njihnin “legjitimitetin e transformimit të LPK-së në Partinë për Bashkim Demokratik”, vazhdojnë të shkruajnë në shkarravinat e tyre se gjoja u bë puç kundër meje për “me ma marrë partinë”! Janë pikërisht njerëz që partitë i shohin si “lodra” në duar të dikujt!

(Muhamet MAVRAJ / Vijon)

Vitin e kaluar 2 000 persona përfituan subvencione nga kryeqyteti për trajtimin e sëmundjeve të rënda

PRISHTINË, 11 JANAR - Kryetari i komunës së Prishtinës, Përparim Rama, ka bërë me dije se më shumë se 2 000 persona vitin e kaluar kanë përfituar subvencion nga kryeqyteti për trajtimin e sëmundjeve të rënda. Sipas tij, i bie rritje prej 20-përqindësh më shumë në krahasim me vitin 2022. “Sot

punëtorët e zellshëm të Sektorit të Shërbimit me Qytetarë janë mbingarkuar nga kërkesat e qytetarëve për subvencionimin nga Drejtoria e Shëndetësisë për sëmundjet malinje dhe kronike të rënda. Në lidhje me këtë, ju njoftoj se kërkesat e juaja pranohen gjatë gjithë vitit dhe ato do t'i shqyrtojë komisioni

profesional. Ne jemi të vetëdijshëm se jeta me një sëmundje kronike sjell sfida të mëdha, jo vetëm shëndetësore, por edhe financiare. Qëllimi ynë është të sigurojmë që të mos ndihen të vetmuar në këtë luftë dhe të ofrojmë një dorë ndihme aty ku është më e nevojshme”, ka theksuar Rama.



90 për qind e pacientëve të trajtuar në Klinikën e Endokrinologjisë kanë qenë me diabet

EPOKA E RE

Faton DËRMAKU

PRISHTINË, 11 JANAR - Sëmundja e sheqerit, apo diabetit melit, është një nga sëmundjet kronike metabolike, e cila, për shkak të rritjes së sheqerit në gjak për një kohë të gjatë, mund të shkaktojë komplikime serioze, të cilat, po nuk u mjekuan me kohë, mund ta rrezikojnë shëndetin e pacientit. Drejtoresha e Klinikës së Endokrinologjisë në Qendrën Klinike Universitare të Kosovës, dr. Merita Emini-Sadiku, ka theksuar se 90 për qind e pacientëve të trajtuar në këtë klinikë kanë qenë me diabet. “Trajtimi i diabeti melit është sëmundje që me të drejtë quhet multisistemike sepse prek inde dhe organe të ndryshme në trup dhe ka nevojë jo vetëm për endokrinologun dhe mjekun familjar, por edhe për shumë specialitete të tjera mjekësore, varësisht se çfarë komplikimi ka pacienti”, ka potencuar Emini-Sadiku. Sipas endokrinologes, shumica e komplikimeve dhe rreziqeve të diabeti vijnë si rezultat i kujdesit jo të mirë, por dhe vonës në kërkimin e ndihmës së mjekut. Ajo këshillon që për menaxhim të diabeti melit nevojitet bashkëpunim i ngushtë dhe korrekt ndërmjet pacientit dhe mjekut në zbatim të këshillave mjekësore, marrjes së terapisë së rregullt dhe kujdesit individual të përditshëm nga pacienti.



Këshillat mjekësore

Vizito mjekun kompetent, vlerëso rrezikun e komplikimeve; Të jesh me diabet, nuk do të thotë të kesh edhe komplikime në organe siç janë sytë, zemra, veshakët, truri dhe ulcerat në këmbë; Ulcerat në këmbë dhe problemet me zemër janë më të shpeshta te kontrolli jo i mirë i sheqerit dhe kur për një kohë të gjatë sheqeri në gjak, apo glikemia është e lartë; Mbajini vlerat e glikemisë nën 7, mmol/L dhe merrni këshillat e nevojshme nga mjeku juaj sidomos

informohuni sa shpesh duhet matur glikeminë dhe kur duhet të bëni vizitat mjekësore; Diabetin për ta trajtuar mirë duhet bashkëpunim i ngushtë mes pacientit dhe mjekut.

Rreziku dhe llojet e komplikimeve

Komplikimet kronike mikrovaskulare me dëmtime në sy nga diabeti, apo retinopati diabetike janë 39.5 për qind; Dëmtimet e nervave të gjymtyrëve, apo neuropati diabetike distale 53 për qind; Dëmtimet në veshka apo

nefropati diabetike 24.7 për qind; Komplikimet kronike makrovaskulare me sëmundje kardiovaskulare (përfshirë këtu koronaropati, hipertension dhe sëmundje kardiovaskulare tjera) 60.12 për qind e pacientëve me diabet tip 2, me sëmundje cerebrovaskulare 4.5 për qind dhe me këmbë diabetike 7.7 për qind.

Trajtimi dhe ofrimi i shërbimeve

Klinika e Endokrinologjisë posedon të gjitha shërbimet e nevojshme sa i përket

sëmundjes së sheqerit; Ofron edukim për sëmundjen, përcaktimin e dietës specifike individuale, koordinimin e terapisë, të bazuar në protokolle të përditësuar (insulinoterapi, ose barna tjera); Ofron shërbimin për këmbë diabetike, vlerësimin e komplikimeve kronike dhe rrezikun për komplikime akute dhe shërbimin gjysmë intensiv për raste të rënda të kësaj sëmundje; Ofron shërbime ambulantore specialistike çdo ditë pune, punojnë 4 deri në 6 endokrinologë, në orare të ndryshme.

Maqedonci: Mazanek shprehu gatishmërinë për ta akredituar atasheun e Mbrojtjes së Kosovës në Çeki

PRISHTINË, 11 JANAR - Ministri i Mbrojtjes, Ejup Maqedonci, ka pritur të enjten në takim njoftues ambasadorin e Republikës së Çekisë në Kosovë, Bohumil Mazanek, të cilit i ka uruar mirëseardhje dhe e ka falënderuar për mbështetjen e Republikës së Çekisë nëpër të gjitha proceset e shtetndërtimit si dhe kontributin e dhënë në kuadër të misionit të NATO-s. Në takim u bisedua lidhur me situatën momentale të

sigurisë në vend dhe përkrahjen e shtetit të Çekisë në rrugën drejt Partneritetit për Paqe dhe iniciativave të tjera, ku ministri Maqedonci theksoi se kjo është e vetmja mënyrë që garanton paqen dhe sigurinë në Kosovë dhe rajon. Gjithashtu u bisedua për rritjen e mëtejme të bashkëpunimit në mes të dy vendeve, me theks të veçantë në fushën e mbrojtjes dhe sigurisë, si dhe mundësinë e nënshkrimit të marrëveshjes për bashkëpunim në mes të

ministrive të Mbrojtjes të të dyja vendeve. Nga ana e tij, ambasadori çek Mazanek shprehu kënaqësinë për liberalizimin e vizave për qytetarët e Kosovës dhe theksoi se vendi i tij do të vazhdojë fuqishëm ta mbështesë Republikën e Kosovës në rrugën drejt integritetit euroatlantik. Ndër të tjera, ambasadori Mazanek shprehu gatishmërinë e Republikës Çeke për ta akredituar atasheun e Mbrojtjes së Kosovës në Çeki.



Mos vajtoni për ata që po ikin, por pyesni veten çfarë po bëni që ata që janë në Kosovë të mbeten në Kosovë



Shkruan:
Safet GËRXHALIU

Viti i ri 2024 filloi me një lajm të pritur, lajm pozitiv, por të vonuar për liberalizimin e vizave. Kjo ka qenë një ëndërr e kamotshme që në Kosovë vërtetë ka ndikuar në forma të ndryshme. Ka qenë një

mungesë e liberalizimit që ka goditur ekonominë e Kosovës, ndërkohë në aspektin politik ka dëmtuar imazhin e Kosovës por në aspektin psikologjik dhe emocional ka qenë vërtetë një momentum ku shqiptarët apo kosovarët e kanë ndërjet veten të përjashtuar padrejtësisht. Ajo çfarë është duke dominuar kohëve të fundit, po shohim debatin rreth largimit të qytetarëve të Kosovës nga Kosova. Duhet të kuptohet që nga Kosova nuk tentojnë apo pretendojnë të largohen vetëm të papunët dhe skamnorët, janë duke ikur edhe familje që kanë një stabilitet ekonomik dhe në këtë drejtim kjo duhet të

jetë një brengë për institucionet që të bëjnë më tepër për t'i motivuar të rinjtë për të qëndruar në Kosovë dhe jo për t'i numëruar sa ikin nga Kosova. Janë shumë arsye pse ata po largohen. Mungesa e stabilitetit politik është mungesë e një perspektive ekonomike dhe është një imazh i dëmtuar i Kosovës. Nëse në këtë kohë kemi ministra dhe politikanë të nivelit të lartë kosovar të cilët në një lloj forme çdo ditë futin frikë përmes paralajmërimeve për luftë, futin frikë dhe hezitim për të besuar në ardhmëri duke shpallur Kosovën si shtet të përkohshëm, janë vërtetë dëme

që po i bëhen Kosovës. Nevojat për të kërkuar arsim më të mirë dhe sistem të shëndetësisë janë po ashtu një ndër arsyt. Mesazhi më i mirë për institucionet dhe sektorin privat është që të mos vajtojnë për ata që po ikin por të bëjnë më tepër që ata që janë në Kosovë të mbeten në Kosovë. Kam pritur që këto ditë qeveria apo kryeministri do të del me një konferencë për medie për të paralajmëruar fillimin e zbatimit të ligjit për sigurinë shëndetësore, kam pritur që do të ketë një pako për të motivuar të rinjtë dhe bizneset, për të rritur pagat dhe për të krijuar stabilitet social.

Kam menduar që do të ketë kampanja vetëdijesuese se Evropa nuk është ajo e viteve të '90-ta por është në masa të inflacionit dhe në një presion politik shkaku i ndodhive globale. Prandaj, definitivisht është obligim moral që të punohet në këtë drejtim. E drejta për të lëvizur është humane dhe njerëzore, e drejta për të gjetur për të jetuar aty ku është më mirë dhe ku e ndjen veten po ashtu është e drejtë humane, dhe në këtë drejtim duhet të krijohen kushtet për të jetuar në Kosovë, për të mos e zbrazur Kosovën dhe jo për të vajtuar sesa e si po ikin nga Kosova.

Emiratet e Bashkuara Arabe heqin vizat për qytetarët e Kosovës



Faton DËRMAKU

PRISHTINË, 11 JANAR - Presidentja e Kosovës, Vjosa Osmani, ka bërë me dije se presidenti i Emirateve të Bashkuara Arabe, Mohammed bin Zayed al-Nahyan, ka pranuar propozimin e saj për heqjen e vizave për qytetarët e Kosovës. Përmes një shkrimi në platformën "X", Osmani ka thënë se marrëveshja ishte arritur gjatë takimit dypalësh në muajin e kaluar dhe "tashmë është nënshkruar, duke hapur rrugë për më shumë mundësi bashkëpunimi midis vendeve tona dhe qytetarëve tanë".

Prej 1 janarit shtetasit e Kosovës me pasaporta biometrike janë në gjendje të udhëtojnë lirshëm



në shtetet e Zonës Shengen, pas hyrjes në fuqi të vendimit për liberalizimin e vizave.

Ndërsa më 5 janar u bë e qartë se ata do të mund ta vizitojnë edhe Spanjën, pas një njoftimi

nga Departamenti për Migrim dhe Çështje të Brendshme i Komisionit Evropian, se Spanja njeh tashmë pasaportën e zakonshme të Kosovës. Liberalizimi i vizave u mundëson qytetarëve të Kosovës, që kanë pasaporta biometrike, të qëndrojnë deri në 90 ditë brenda gjashtë muajsh në cilindo nga 27 shtetet anëtare të Zonës Shengen. Udhëtimet pa viza shërbejnë për vizita turistike, çështje familjare ose të ngjashme. Megjithatë, liberalizimi i vizave nuk nënkupton leje pune apo përfitime të tjera. Kosova ishte vendi i fundit i Ballkanit Perëndimor, qytetarët e të cilit deri më 1 janar të këtij viti nuk mund të lëviznin

lirshëm në Zonën Shengen. Ish-ambasadori i Kosovës në Emiratet e Bashkuara Arabe, Avni Arifi, ka reaguar pas heqjes së vizave nga Emiratet e Bashkuara Arabe. "Lajmi për heqjen e vizave nga ana e Emirateve është lajm shumë i mirë për Kosovën. Emiratet e Bashkuara Arabe nuk janë vetëm vend i rëndësishëm politik në Lindjen e Mesme apo destinacion turistik global por mbi të gjitha është vendi i pestë në botën e rieksperteve globale (trade hub) dhe ofron potencial të jashtëzakonshëm ekonomik për bashkëpunim jo vetëm me kompanitë e këtij vendi por me të gjitha kompanitë botërore. Kjo është një lehtësim jo i vogël për kompanitë e Kosovës", ka shkruar Arifi në "Facebook".

KEDS-i ndërtoi nënstacionin e ri në Kaçanik, përfitues mbi 12 mijë qytetarë dhe biznese

PRISHTINË, 11 JANAR - Në daljen e parafundit të autostradës Prishtinë - Shkup, përkatësisht në Doganaj të Kaçanikut, kur merr drejtimin për Brezovicë, shtrihet një objekt krejtësisht i ri, i veshur me një fasadë që rrezaton bardhësi në këtë dimër pa borë. Është ky nënstacioni Kaçaniku II 35/10 kV prej të cilit përfitojnë mbi 12 mijë qytetarë dhe biznese të asaj ane. Me lokacion vetëm disa metra nga fabrika e Silcaporit, një nga më të mëdhatë në vend, ky nënstacion jep një mesazh të qartë: Kosova po zhvillohet. KEDS-i investoi fuqishëm aty në përgjigje të kërkesës në rritje për furnizim me energji elektrike të pjesës juglindore të vendit.

Ky nënstacion është realizuar me qëllim të përmirësimit të qëndrueshmërisë në furnizim, zvogëlimit ose eliminimit të mbingarkesave në rrjet, përmirësimit të rënies të tensionit dhe mbështetjes ndaj rritjes së ngarkesës. Që nga data 26 dhjetor 2023 nga daljet e këtij nënstacioni, Doganaj, Duraj, Kaçaniku i Vjetër dhe Dubravë - Kaçanik furnizohen më shumë se 3 500 konsumatorë. Nënstacioni i ri është duke përmirësuar ndjeshëm stabilitetin e rrjetit energjetik në Kaçanik. Duke rishpërndarë ngarkesën dhe duke optimizuar rrjedhën e fuqisë, janë eliminuar edhe mbingarkesat dhe rëniet e tensionit.



Nënstacioni i ri është projektuar duke lejuar zgjerimet e ardhshme dhe duke përshtatur kërkesat në rritje për energji të rajonit të Kaçanikut. Projekti është realizuar brenda një periudhe shumë të shkurtër falë angazhimit maksimal të ekipeve

tona dhe vendosmërisë së kompanisë që ky nënstacion të jetësohet sa më parë. Investimet e tilla kapitale, si ky në Kaçanik, ndikojnë në përmirësimin dhe modernizimin e infrastrukturës energjetike duke rezultuar me rritje të

besueshmërisë së sistemit dhe furnizim të qëndrueshëm. "Përfundimi me sukses i projektit të nënstacionit të tensionit të mesëm në Kaçanik është një dëshmi e përkushtimit të kompanisë sonë për t'i përmbushur nevojat në zhvillim të konsumatorëve tanë. Duke adresuar sfida të tilla si stabiliteti i rrjetit dhe rritja e ngarkesës, ne kemi përmirësuar ndjeshëm besueshmërinë dhe efikasitetin e sistemit të shpërndarjes së energjisë. Ky projekt është një nga 400 projektet investive që kompania filloi implementimin anekënd vendit duke ndikuar që rrjeti i shpërndarjes të kalojë në një nivel më të avancuar", ka njoftuar KEDS-i.

Çfarë dihet për rastin e faturave fiktive në ATK?

PRISHTINË, 11 JANAR - Dymbëdhjetë zyrtarë të Administratës Tatimore të Kosovës (ATK) janë arrestuar më 9 janar gjatë një aksioni të Prokurorisë Themelore në Prishtinë dhe hetuesve të Drejtorisë së Krimeve Ekonomike të Policisë së Kosovës. Ata dyshohen për mashtrim në detyrë. Prokurori i Shtetit ka bërë me dije të martën se ndaj zyrtarëve është caktuar masa e ndalimit prej 48 orësh. Ata dyshohet se janë përfshirë në një rast me tre pronarë biznesesh, të cilët, duke përdorur dokumente të rrejshme dhe shmangie nga tatimi, ishin gati ta dëmtonin buxhetin e shtetit të Kosovës në vlerë prej 2.8 milionë eurosh. Një prej këtyre personave është arrestuar të martën, ndërsa dy të tjerë janë në kërkim. Prokuroria ka bërë kërkesë pasditen e së mërkurës në Gjykatën Themelore në Prishtinë për caktimin e masës së paraburgimit për 13 të arrestuarit, konfirmoi për Radion Evropa e Lirë zëdhënësja e Prokurorisë Themelore të Prishtinës, Laureta Ulaj. Administrata Tatimore e Kosovës nuk ka reaguar lidhur me këtë rast dhe zëdhënësja Valentina Bytyçi i ka thënë Radios Evropa e Lirë se kjo është për arsye se ende, sipas saj, nuk kanë pranuar nga Prokuroria asnjë shkresë me emrat e zyrtarëve të dyshuar.

Si erdhi deri tek arrestimi i tyre?

Prokuroria tha se të pandehurit kishin pranuar në institucionin e ATK-së 23 fatura fiktive nga një pronar biznesesh në Prizren, i identifikuar me iniciale F.P. Ky i fundit, sipas Prokurorisë, kishte aplikuar për rimbursim nga Tatimi mbi Vlerën e Shtuar (TVSh) me fatura fiktive që arrinin vlerën prej 18 milionë eurosh. Rimbursimi pastaj do të bëhej në vlerë prej 2.8 milionë eurosh. Policia arrestoi të martën edhe të dyshuarin F.P., pronar i tri



bizneseve në Prizren. Të mërkurën Radio Evropa e Lirë bisedoi me Valdrin Gashin, avokat i cili po e mbron të pandehurin, dhe ai konfirmoi se bëhet fjalë për Feim Pulajn, pronar i hotelit “Lakeside” në Vermicë të Prizrenit. Gashi konfirmoi se të martën janë kryer bastisje në shtëpinë e Pulajt, veturën dhe hotelin e tij. Në mbrëmje vonë, tha ai, është dhënë deklarata në Policinë e Kosovës, ndërsa tani janë në pritje të një njoftimi nëse do të caktohet seanca për paraqitje në gjykatë. Sipas prokurorisë, zyrtarët tatimorë ia kishin njohur si të rregullta faturat Feim Pulajt, “kinse për ndërtimin e një hoteli, i cili veçse ka qenë i ndërtuar më parë”. Aksioni i autoriteteve të Kosovës është zhvilluar në Prizren dhe Podujevë dhe, sipas njoftimit zyrtar të Prokurorisë, të arrestuarit dyshohen për kryerjen e tri veprave penale: “Mashtrim në detyrë”, “Dokumente të rrejshme lidhur me tatimin” dhe “Shmangie nga tatimi”.

Ku i kishte siguruar pronari i hotelit faturat fiktive?

Prokuroria tha se dy persona të tjerë, B. B. dhe B. B., pronarë të një biznesi në Podujevë, kanë vënë në dispozicion faturat për F.P., biznesmenin nga Prizreni që avokati i tij e identifikoi si Feim Pulaj. Autoritetet e rendit vazhdojnë t'i kërkojnë edhe dy personat të cilët dyshohet se bashkë kanë kryer veprat penale “Dokumente të rrejshme lidhur me tatimin” dhe “Shmangie nga tatimi”. Si rezultat i këtyre veprimeve, zyrtarët e ATK-së i kanë njohur të drejtën e rimbursimit të TVSh-së së zbritshme në shumën prej 2.8 milionë eurosh. Pavarësisht se faturat e paraqitura ishin fiktive, aplikimi i pronarit të biznesit për rimbursim për TVSh ishte pranuar. Por, Prokuroria tha se procedura është pezulluar në momentet e fundit për shkak të inicimit të rastit penal ndaj të

pandehurve. Zyrtarët tatimorë të përfshirë në këtë rast, sipas Prokurorisë, janë: M. Z., N. B., S. T., A. J., M. R., M. Z., M. B., G. Gj., A. P., V. K., A. R., Xh. H.

Çfarë u konfiskua gjatë aksionit?

Armë e pajisje të tjera u gjetën dhe u konfiskuan gjatë aksionit të 9 janarit. Batisjet kryesore u kryen në dy lokacione, në Prishtinë dhe në Prizren. Gjatë kontrolleve në objektet e personit me inicialet F.M., sipas Prokurorisë, u gjetën dhe u konfiskuan armë, prej tyre tri të gjata dhe tri të shkurta. Po ashtu, u konfiskuan pajisje elektronike, telefona dhe prova të tjera materiale.

Dënimet sipas Kodit Penal të Kosovës

“Mashtrimi në detyrë” është vepër penale e dënueshme sipas Kodit Penal të Kosovës, e

përcaktuar me nenin 419. Gjobë dhe dënim me burgim prej gjashtë muajsh deri në pesë vjet parashihet në rastet kur me qëllim të përfitimit të kundërligjshëm të dobisë pasurore për vete apo personin tjetër, dikush bën krijimin, përdorimin ose prezantimin e rremë të raportit të llogarive “apo në ndonjë mënyrë tjetër e vë në lajthim personin e autorizuar, për kryerjen kundërligjshëm të pagesës ose transferit të parave, pasurisë ose të drejtave tjera”. Ndërsa dënim me deri në tetë vjet burgim shqiptohet kur vepra penale është në vlerë pasurore mbi 5 000 euro, derisa për shumën mbi 50 000 euro parashihet burgim deri në dymbëdhjetë vjet. Pika tjetër e këtij neni parasheh dënim me gjobë ose burgim prej një deri në tetë vjet për personin që me qëllim të kryerjes, fshehjes ose maskimit të një veprë penale, “krijon ose përdor një faturë ose ndonjë dokument tjetër kontabël ose regjistrim që përmban informata të rrejshme ose jo të plota, ose heq dorë nga regjistrimi i pagesës”. Dënime me gjobë dhe me burgim nga tre deri në tetë vjet parashihen edhe për personat që përdorin dokumente të rrejshme lidhur me tatimin. Përdorimi i faturave fiktive dënohet me deri tre vjet burgim e “nëse vepra penale është kryer për të shmangur pagesën e tatimit prej 15 000 eurosh apo më shumë, kryesi dënohet me gjobë dhe me burgim prej gjashtë muaj deri në pesë vjet”. Në rastet kur vepra e tejkalon shumën prej 50 000 eurosh, dënimi përveç me gjobë, është edhe me burgim deri në tetë vjet. Për shmangie nga tatimi, parashihen dënime me gjobë dhe me burgim deri në katër vjet, varësisht nga shuma e përdorur. Për shembull, nëse tejkalohet shuma prej 15 000 eurosh, parashihet dënim nga gjashtë muaj deri në pesë vjet burgim, ndërsa për shumën prej 50 000 euro parashihet dënim, përveç me gjobë, edhe me burgim një deri në tetë vjet.

Rritet tregtia me pakicë e pajisjeve informatike dhe të komunikimit

Prishtinë, 11 janar- Agjencia e Statistikave të Kosovës (ASK) ka publikuar statistikat afatshkurtra të tregtisë me pakicë për muajin tetor 2023. Në muajin tetor 2023, indeksi i qarkullimit të tregtisë me pakicë kishte rritje më të madhe te tregtia me pakicë e pajisjeve informatike dhe të komunikimit, në dyqane të specializuara (43,2%); Tregtia me pakicë jo në dyqane (përmes postës ose internetit) (31,1%), krahasuar me muajin

e njëjtë të viti paraprak (tetor 2022). Ndërsa rënie kishte te tregtia me pakicë e karburantit për automjete, në dyqane të specializuar (-14,09%); Tregtia me pakicë e mallrave kulturore dhe të argëtimit, në dyqane të specializuara (-13,32%), krahasuar me muajin e njëjtë të viti paraprak (Tetor 2022). Në muajin tetor 2023, indeksi i numrit të të punësuarve kishte rritje më të madhe te:

Tregtia me pakicë jo në dyqane, tezga ose tregje (12,5%); dhe Tregtia me pakicë e pajisjeve informatike dhe të komunikimit, në dyqane të specializuara (7,5%). Ndërsa rënie kishte te tregtia me pakicë jo në dyqane (përmes postës ose internetit) (-15,7%); Tregtia me pakicë e mallrave kulturore dhe të argëtimit, në dyqane të specializuara (-1,4%), krahasuar me muajin e njëjtë të viti paraprak (tetor 2022).



Të panjohurat e mëdha

Shumë pyetje të rëndësishme kanë mbetur pa përgjigje. Disa shkencëtarë i përgjigjen një pyetjeje: cila është ajo gjë që do të doje ta dije për planetin, që mbetet mister?



Sa specie ka në Tokë?

“Me sa lloje kafshësh e ndajmë planetin? Vlerësimet variojnë nga 3 milionë deri në 100 milionë, dhe nuk ka shumë shenja që po konvergojmë në një përgjigje unike.”

Prof Andy Purvis është studiues në Muzeun e Historisë Natyrore

Do të kthehesha 540 milion vjet mbrapa për të parë ‘Big Bang-un biologjik’

“Si një biolog evolucionar, do të më pëlqente që një makinë kohe të më kthente në shpërthimin Kambrian [kur shumica e grupeve kryesore të kafshëve u shfaqën për herë të parë në të dhënat fosile], sepse kjo periudhë e shkurtër rezultoi në ngritjen vërtet të shpejtë të shumicës së grupeve të kafshëve, dhe pse disa prej tyre, si për shembull trilobitët [artropodët e zhdukur detarë], nuk mbijetuan.”

Biologu evolucionar Dr Corrie Moreau është ekspert për milingonat në laboratorin Moreau të Universitetit Cornell

A mund të ndihmojnë disa nga format më të vogla të jetës, në shmangien e krizës klimatike?

“Ashtu si ne njerëzit mbështetemi te mikrobiomat e zorrëve për një shëndet të mirë të tretjes, papastërtia nën këmbët

tona përmban një numër të panumërt bakteresh, kërpudhash dhe virusesh që ndikojnë në shëndetin e Tokës dhe të bimëve që rriten në të. Sepse shumica e këtyre organizmave nuk mund të kultivohen në laborator, dhe dimë shumë pak për ekologjinë e tyre. Megjithatë, prania e mikrobeve të caktuara mund t'i ndihmojë pemët të rriten deri në tre herë më shpejt. A mund të jenë aleatë këta ‘mikrobe të mira’, në luftimin e ndryshimeve klimatike dhe promovimin e sigurisë ushqimore?”

Dr Bonnie Waring është një pedagoge e lartë në Institutin Grantham të Kolegjit Imperial në Londër.

Cili është biodiversiteti i plotë i pyjeve tropikale të pellgut të Amazonës ose Kongos?

“Do të doja të kuptoja diversitetin e plotë në një zonë të vogël të pyjeve tropikale – si 100 me 100 metra: sa specie jetojnë ose kalojnë atje, ndërveprimet e tyre me njëra-tjetrën, sa të vjetër janë, nga kanë ardhur. Përveç njohurive shkencore që kjo do të na ofronte, shpresoj se do të ndihmonte për të bindur njerëzit për kompleksitetin dhe vlerën ekstreme të ekosistemeve të mbledhura gjatë mijëvjeçarëve – dhe se mbrojtja e asaj që na ka mbetur është gjithmonë një zgjedhje më e mirë, sesa shkatërrimi dhe përpjekja për ta

rivendosur më vonë.”

Prof Alexandre Antonelli është drejtor i shkencës në Kopshtin Botanik Mbretëror, Kew

Si ndikojnë kafshët në Tokë?

“Si e formojnë kafshët pamjen dhe funksionin e ekosistemeve? Ne e dimë se ato veprojnë në disa mënyra të mirëpublikuara, të tilla si pjalmimi ose shpërndarja e farave, por ka shumë mënyra delikate – të tilla si cikli i lëndëve ushqyese, ngrënia selektive e bimëve, rrjetet e ndërlikuara të grabitqarëve dhe gjahut – që janë kuptuar keq, por vazhdimisht na befasojnë. Vetëm muajin e kaluar, mësova se merimangat përcaktojnë se ku rriten bimët dhe ekosistemet shërohen pas një shpërthimi vullkanik, duke kapur fara në rrjetat e tyre. Dhe në fund të fundit, sa ndikon kjo kafshë me rëndësi në biomën apo materien në nivel global? Sa shumë kafshët i japin formë funksionimit të planetit Tokë?”

Yadvinder Malhi është profesor i shkencës së ekosistemeve në Universitetin e Oksfordit

Çfarë do të ndodhë me Rrymën e Gjirit (Gulf Stream)?

“Nëse do të më duhej të dija një gjë që është e pasigurt, është nëse do ndodhë, dhe nëse po, kur Rrjedha e Gjirit do të mbyllet

papritur, duke ndryshuar plotësisht klimën e Evropës, duke shkaktuar një rënie drastike të temperaturave – me ndikime potencialisht katastrofike në sigurinë e ujit dhe ushqimit – ndërsa pjesa tjetër e planetit piqet për shkak të ndryshimeve klimatike.”

Sir Robert Watson është një nga shkencëtarët më të shquar të klimës në Mbretërinë e Bashkuar

A caktojnë rregullat universale se si evoluojnë bimët dhe kafshët?

“Organizmat me prejardhje shumë të ndryshme (duke përfshirë kafshët dhe bimët) duket se ndjekin një numër të kufizuar “stilesh” të përgjithshme. Cilat janë rregullat e përgjithshme që rregullojnë mënyrën se si ato janë ‘bashkuar’ dhe çfarë i bën disa stile shumë më të suksesshme në Tokë se të tjerët? Nëse ekzistojnë rregulla të tilla, a janë të njëjta për kafshët dhe bimët?”

Sandra Myrna Diaz është profesoreshë e ekologjisë në Universitetin Kombëtar të Kordobës, Argjentinë

Sa njerëz mund të përballojë Toka?

“Me ritmin aktual, do të duhen vetëm 10 vjet për të shtuar 1 miliard njerëz të tjerë në planet.

Tashmë jemi dëshmitarë të ndikimit shkatërrues të rritjes së paqëndrueshme të popullsisë. Nëse do të jetojmë në ekuilibër, shëndet dhe harmoni me natyrën, sa njerëz të tjerë do të mund të strehojë Toka?”

Dr Gladys Kalema-Zikusoka ishte veterinerja e parë e kafshëve të egra në Ugandë dhe është një pioniere e konservimit

Cilat specie do t'i përshtaten krizës klimatike?

“Cilët janë kufijtë e përshtatjes së specieve dhe pse? Ne e dimë se klima po ndryshon dhe speciet po përshtaten, por nuk e kuptojmë se cilët janë kufijtë dhe pse ndryshojnë. Cilat specie do të dështojnë të përshtaten mjaft shpejt dhe në cilën pikë? Kush do të përshtatet dhe do të lulëzojë – dhe çfarë i përcakton këto përgjigje? Çfarë mund të bëjmë ne si shoqëri për të ndihmuar speciet të përshtaten? Këto janë pyetje themelore, përgjigjet e të cilave do të përcaktojnë se si do duket bota natyrore në të ardhmen, por të cilat gjithashtu ofrojnë njohuri të thella se si funksionon dhe evoluon biologjia.”

Sir Patrick Vallance është ish-këshilltari kryesor shkencor i qeverisë së Mbretërisë së Bashkuar dhe kryetar i bordit të Muzeut të Historisë Natyrore (bota.al)



Veton ZYMBERI, redaktor i sportit

Ramaj refuzon Kosovën dhe Shqipërinë, pret ftesë nga Gjermania



AMSTERDAM, 11 JANAR - Portieri i Ajaxit, Diant Ramaj, ka treguar se ka lënë në pritje ofertat nga Përfaqësuesja e Kosovës dhe ajo e Shqipërisë, pasi shpreson në një ftesë nga Kombëtarja e Gjermanisë. Mediumi holandez Het Parool, me bazë në Amsterdam, ka bërë një intervistë të gjatë me portierin me prejardhje nga Kosova, Diant Ramaj, i cili po shkëlqen këtë sezon me gjigantin evropian, Ajaxin. Megjithatë, për mediet shqiptare fokusi i intervistës padyshim se është ajo çfarë 22-vjeçari ka thënë për karrierën e tij ndërkombëtare. Sipas mediumit Het Parool, Ramaj ka luksin të jetë në gjendje ta zgjedhë njërin nga tri shtetet si përfaqësues. Madje ai ka rezervuar ftesa nga Kosova

dhe Shqipëria, pasi shpreson në një thirrje nga Die Mannschaft. “Më duhet të bëj një zgjedhje, por nuk dua ta bëj shumë shpejt. Kosova dhe Shqipëria tashmë më janë afuar. Thashë se më duhet kohë, edhe sepse shpresoj dhe pres Gjermaninë”, ka thënë Ramaj, i cili tashmë ka luajtur për ekipet e moshave të Gjermanisë. Ramaj e di se Gjermania ka portierë me përvojë si Manuel Neuer, Marc-Andre ter Stegen dhe Kevin Trapp, por mendon se mund të ftohet. “Por portierët e Gjermanisë janë mbi tridhjetë vjeç. Kur shikoj vendet e tjera, ka një portier të ri kudo. Shikoni Bart Verbruggen në Holandë. Nuk po them se duhet të shkoj si portier i parë atje, por është mirë që edhe Gjermania të

thërrasë një të ri dhe t’i tregojë botës se një brez i ri po vjen”, ka deklaruar ai. “Në këtë moshë unë jam portier për një klub të madh. Ajaxi nuk është në formën më të mirë tani, por po ndërton përsëri diçka për t’i ringjallur kohët e vjetra të suksesit. Pak portierë të rinj kanë mundësinë të luajnë për një klub kaq të madh dhe të fitojnë përvojë”, ka pohuar Ramaj. “Ndoshta pres kot! Nga ana tjetër nuk dëshiron të zbulosh më vonë se mund të ishe portier i Gjermanisë. Zemra ime rreh për të dyja palët: Shqipërinë dhe Kosovën e shoh si atdheun tim, por jam lindur dhe rritur në Gjermani. Kjo nuk është absolutisht e lehtë”, ka përfunduar 22-vjeçari.

SHKURT

Gjilani konfirmon largimin e Bejtullait dhe Nafiut

Skuadra e Gjilanit ka njoftuar se e ka përfunduar bashkëpunimin me futbollistët Egzon Bejtullai dhe Valmir Nafiu. “Skifterat” njoftojnë se ndarja vjen pas një marrëveshjeje të dyanshme. “Klubi i falënderon Egzon Bejtullain dhe Valmir Nafiun për kontributin e dhënë në fanellën kuqebardh, duke u uruar suksese të mëtutjeshme në sfidat e ardhshme. Faleminderit për momentet e bukura dhe angazhimin në klubin tonë!”, ka njoftuar klubi gjilanas.

Mulaj largohet nga Trepça '89

Futbollisti Erblind Mulaj në “Facebook” ka njoftuar se ka ndërprerë kontratën me skuadrën e Trepçës '89. Ai ka falënderuar drejtuesit e klubit, shtabin teknik dhe bashkëlojtarët. “Pas gjysme sezoni të kaluara te KF Trepça '89 dua t’ju informoj se për arsye personale kemi ndërprerë kontratën me konsensus bashkëpunimi. Falënderoj presidentin Abedin Zeka bashkëlojtarët dhe shtabin teknik. Klubit i uroj suksese në vazhdim”, ka shkruar Mulaj.

Për 100 mijë euro dështoi transferimi i Gashijanit te Hajduku

Sulmuesi i ri i Llapit, Elvir Gashijani, ishte afër nënshkrimit me Hajdukun e Splitit, por duket se çështja ka ngecur shkaku i financave. Hajduku raportohet se ka ofruar 200 mijë euro për 17-vjeçarin, por Llapi ka kërkuar 300 mijë euro, raporton gazeta kroate “Slobodna Dalmacija”. Gashijani është anëtar i Përfaqësueses së Kosovës U19 dhe këtë sezon ka zhvilluar 13 paraqitje me Llapin në Superligën e Kosovës në të cilat ka shënuar dy gola dhe ka shtuar një asistim. Ai ka shënuar edhe dy gola për kombëtaren në ndeshjen kundër kombëtares U19 të Ukrainës. Sipas Transfermarkt, vlera e tij në treg është 125 mijë euro.

Kosova bëri hapin e rëndësishëm drejt fazës tjetër

Përfaqësuesja e Kosovës në hendboll ka fituar ndaj Britanisë së Madhe me rezultatin 30:22. Pjesa e parë ishte më e barabartë, ndërsa Kosova ka pasur telashe të dalë në lojën më të mirë të saj. Rezultati pas 30 minutave ishte 13:11. Paraqitja e Kosovës në pjesën e dytë ishte shumë më e mirë. U krijua epërsi deri në 13 gola, ndërsa në fund britanikët u afruan në tetë gola. Tjetër fitore synohet të shtunën prej orës 14:00 në Derby të Anglisë, kur pritet të konfirmohet kualifikimi në fazën e ardhshme të eliminatorëve për “Euro 2026”. Kapiteni Valon Dedaj ka udhëhequr Kosovën me 11 gola nga 16 tentime. 11 pritje i kishte portieri Haris Berisha, ndërsa shtatë gola i shënoi Kushtrim Ninaj. Nga katër gola shënuan Matej Thaqi e Arbios Mushkolaj.

Ndeshjet e Kupës në basketboll zhvillohen në Gjakovë

GJAKOVË, 11 JANAR - Bordi i Federatës së Basketbollit të Kosovës (FBK), duke u bazuar në kompetencat e statutit, ka marrë vendim që Final 8 i Kupës së Kosovës të organizohet nga KB Vëllaznimi. Njëherësh Bordi i FBK-së udhëzon KB Vëllaznimin t’i fillojë përgatitjet e nevojshme në përputhje të Udhëzuesit për

Organizimin e Final 8 Kupës së Kosovës dhe akteve të tjera normative të FBK-së. Final 8 i Kupës së Kosovës do të organizohet nga 13 deri më 17 shkurt në qytetin e Gjakovës. Në Final 8 do të garojnë tetë skuadrat e elitës së basketbollit si dhe finalja në konkurrencën e femrave. Në Ditën e Pavarësisë

së Kosovës, më 17 Shkurt, do të organizohen tri finale: e Kupës së Ligës së Parë, e Femrave dhe e Meshkujve. Në Gjakovë për pesë ditë do të ketë spektakël të basketbollit, me finalët që pritet të jetë të jashtëzakonshme. Atmosfera në “Shani Nushi” ka qenë fantastike dhe kështu pritet të jetë edhe gjatë Final 8.



9 minuta tmerri për Gambian në ajër, avioni nuk kishte oksigjen

BANJUL, 11 JANAR - Kombëtarja e Gambias ka përjetuar momente tmerri para nisjes së Kupës së Kombeve të Afrikës. Futbollistët dhe i gjithë stafi u nisën me avion nga kryeqyteti i vendit, Banjul, drejt Bregut të Fildishtë. Vetëm 9 minuta pas shkëputjes

nga pista, piloti vendosi të rikthehej sërish, pasi mungonte oksigjeni në bordin e avionit. Në një postim në “Instagram”, ish-futbollisti i Manchester Unitedit, Saidy Janko, ka shkruar se shumë futbollistë patën dhimbje të forta të kokës

dhe marramendje ekstreme. Ndërkohë, trajneri belg i Gambias, Tom Saintfiet, ka shkruar: “Ne të gjithë mund të kishim vdekur. Të gjithëve na zuri gjumi brenda pak minutave. Unë po përjetoja vegime për jetën time. Pas 9

minutash piloti vendosi të riktheheshim në pistë sepse nuk kishte furnizim me oksigjen. Disa lojtarë ishin në gjumë kur u rikthyem në pistë. Nëse do të qëndronim edhe pak në ajër, do të kishim vdekur të gjithë. Unë jam i gatshëm të vdes në fushën



e lojës për futbollin, por jo në ajër”.

Ish-trajneri i Anglisë: Jam me kancer, më ka mbetur vetëm edhe një vit jetë

STOKHOLM, 11 JANAR - Ish-trajneri i Anglisë, Sven-Goran Eriksson, ka thënë se ai është diagnostikuar me kancer dhe se në skenarin më të mirë të mundshëm, ai ka vetëm edhe një vit jetë. 75-vjeçari e çoi Anglinë në finalët e Kupës së Botës në 2002 dhe 2006, duke humbur në çerekfinale në të dy rastet, si dhe në “Euro 2004”. Ai drejtoi ekipe si Benfica, Roma dhe Manchester City gjatë karrierës së tij prej katër dekadave. Në shkurt të vitit të kaluar ai u largua nga roli i tij në klubin suedez Karlstad për shkak të “çështjeve shëndetësore”. “Të gjithë mund të shohin se unë kam një sëmundje që nuk është e mirë dhe të gjithë supozojnë se është kancer, dhe është. Por unë duhet ta luftoj atë sa më gjatë që të jetë e mundur”, ka thënë Erikssoni



në një paraqitje në “Radio P1” suedeze. “Unë e di që në rastin më të mirë është rreth një vit, në rastin më të keq edhe më pak. Ose në rastin më të mirë mendoj edhe më gjatë. Unë nuk mendoj se mjekët që kam mund të jenë plotësisht të sigurt. Është më

mirë të mos mendosh për këtë. Ju duhet ta mashtroni trurin tuaj. Unë mund të shkoj duke menduar për këtë gjatë gjithë kohës dhe të ulem në shtëpi dhe të jesh i mjeruar dhe të mendosh se jam i pafat dhe kështu me radhë”, ka deklaruar Erikssoni.

Bostoni fiton sfidën e kryesuesve, humbasin Golden State, Miami dhe Denveri



BOSTON, 11 JANAR - Denveri fitoi me rezultat 127-120 ndaj Minnesotas në përballjen mes dy skuadrave që kryesojnë konferencat përkatëse. Fitore e merituar e Celticsit, ku u dalluan Tatumi me 45 pikë e

Browni me 35 pikë e 11 rebounde. Humbet ekipi kampion i Denverit, që u mund me shifrat 124-111 nga Utah Jazz. Clarksonit e Markkaneni realizuan 53 pikë së bashku për Jazzin, duke i bërë të pavlefshme 27

pikët e Jokiqit për miqtë. Vijon kriza e Golden States, që u mund thellë me rezultat 141-105 në fushën e tij nga New Orleansi, duke dalë edhe nga zona “play-out”. Tetë lojtarë të ekipit mik realizuan mbi 10 pikë, ndërsa për Warriorsin mungoi lojtari lider. Zhgënjeu edhe Miami, që u mund me rezultat 128-120 nga Oklahoma, që falë këtij triumfi, ngjitet në vendin e dytë në Perëndim. Shai me 28 pikë u dallua për Oklahoman. Fituan edhe clippersat, 126-210 ndaj Torontos, ndeshje ku u dalluan Leonard e George me nga 29 pikë secili.

REZULTATET	
Boston - Minnesota	127-120
Charlotte - Sacramento	98-123
Detroit - San Antonio	108-130
Indiana - Washington	112-104
Atlanta - Philadelphia	139-132
Miami - Oklahoma	120-128
Chicago - Houston	124-119
Golden State - New Orleans	105-141
Utah Jazz - Denver	124-111
Clippers - Toronto	126-120

SHKURT

Hamiltoni: Kam thënë se jam i sëmurë për të mos marrë pjesë në teste

Piloti britanik i Mercedesit, Lewis Hamilton, që sapo ka mbushur 39 vjeç, është piloti më i suksesshëm në historinë e Formulës 1, me 103 fitore. Gjithsesi, ka diçka në këtë sport që 7 herë kampioni i botës nuk e pëlqen: testet. Dikur pilotët mund të zhvillonin mjaft ditë teste në prag të sezonit, ndërsa tani ato janë reduktuar në disa orë. E, megjithatë, Hamiltoni do të dëshironte që ato të mos ekzistonin fare, apo të zgjasnin shumë më pak. Sipas “Race Fans”, Hamiltoni ka deklaruar se shpesh ka mashtruar për të evituar të merrte pjesë në teste. “Në të shkuarën kam bërë sikur kam qenë i sëmurë për të mos marrë pjesë në disa teste”, rrëfen britaniku. “Në përgjithësi, nuk më pëlqejnë ditët e provave. Një ditë, kur mësova se George nuk do të merrte pjesë në teste se ishte i sëmurë, mendova se ma hodhi, por ai ishte vërtet i sëmurë. Do të pëlqeja sa më pak teste ose aspak”, ka deklaruar Hamiltoni.

Griezmanni bëhet golashënuesi më i mirë në histori të Atletico

Sulmuesi Antoine Griezmann e ka thyer rekordin e legjendës Luis Aragones, duke u bërë golashënuesi më i mirë në histori të klubit të Atletico Madridit. Atletico pësoi humbje me rezultat 5-3 (3-3) nga Real Madridi në gjysmëfinalen e zhvilluar në Arabinë Saudite në kuadër të Superkupës së Spanjës. Megjithatë, edhe pse ishte një natë zhgënjyese për “Los Rojiblancos”, një pikë e ndritur ishte goli i bukur i shënuar nga Griezmanni. Ky gol ishte i 174-ti i francezit Griezmann për klubin kryeqytetas, i cili e vendosi atë përpara Luis Aragones (173) si golashënuesi më i mirë në historinë e Atletico. “Është diçka e pabesueshme për mua, një burim i madh krenarie. Në pjesën e parë kishte shumë emocione, por ne duhej të ktheheshim në lojë”, ka thënë Griezmanni.

Xavi vendos, këta futbollistë largohen nga Barça

Xavi Hernandez është duke bërë hapa të rëndësishëm drejt ndërtimit të një skuadre të re dhe të fuqishme për sezonin e ardhshëm në Barcelona. Në përpjekjen për ta realizuar vizionin e tij për futbollin, raportohet se ai ka planifikuar largimin e disa lojtarëve të njohur. Emrat që janë në rrezik të largohen nga Barcelona përfshijnë Joao Felix, i cili, megjithëse ka mbështetjen e presidentit, duket se nuk ka mbështetjen e Xavit. Ansu Fati, një talent i akademisë, mund të përfshihet në një marrëveshje të rëndësishme financiare gjatë verës. Në përpjekje për ta forcuar mbrojtjen, Xavi ka shprehur dëshirën për ta mbajtur Joao Cancelo. Sergino Dest, ndërkohë, mund të largohet në një klub tjetër. Në mesfushë, Xavi synon të sjellë një mesfushor mbrojtës më të profilizuar, duke vendosur në rrezik vendin e Oriol Romeut. Dy lojtarët e tjerë që pritet të largohen janë Marcos Alonso dhe Clement Lenglet.

Anelotti: Përmbysjet janë pjesë e AND-së së Realit

Real Madridi shkoi në finalen e Superkupës së Spanjës pas fitores 5-3 ndaj Atletico Madridit në derbin e luajtur në Riad të Arabisë Saudite. Një ndeshje e vendosur pas 120 minutave shtesë, ku dy herë “los blancos” përmbysi disavantazhin e

“colchoneros”, për të arritur një fitore të madhe. “Uroj që kjo ndeshje t’u shërbejë më të rinjve. Mund të humbasësh, por kurrë nuk duhet hequr dorë”, ka thënë Anelotti. “Duhet ende edhe katër ditë deri në finale, por tensioni në këtë ndeshje

ishte i tmerrshëm. Një ndeshje e dueluar fort, mes dy ekipesh që luftuan fort. Mendoj se ishte një ndeshje spektakli për futbollin. Fituan pasi patëm më shumë energji në fundin e ndeshjes”, ka shtuar ai. “Fituan ata që hynë si

zëvendësues, Joselu, Brahim, Ceballos. Kjo i jep shumë besim një trajneri, pasi sheh se e gjithë skuadra është e motivuar. Vetëm kështu mund të fitohen këto takime”, ka deklaruar Anelotti. Problem për Realin janë golat e shumtë të pësuar:

“Më shqetësojnë, pasi duhet të përmirësohemi. Gjithsesi, jemi të qetë edhe pse duhen ende 90 minuta për ta fituar trofeun. Përmbysjet? Nuk ka asgjë të re për mua. Mendoj se kjo është pjesë e AND-së së Real Madridit”.



MITROVICA
KOMPANIA UJËSJELLËSI RAJONAL SH.A.
REGIONAL WATER COMPANY J.S.C.
KOMPANIJA REGIONALNI VODOVOD D.D.

D P A
Departamenti për punë administrative

Mitrovicë 12.01.24/Nr. 43

Në bazë të Udhëzimit Administrativ Nr.07/2017, Kompania Rajonale Ujësjellësi "Mitrovica" Sh.A. në Mitrovicë, shpallë këtë:

K O N K U R S

(Për plotësimin e vendit të punës, punë provuese gjashtë (6) muaj me mundësi vazhdimi)

I. Pozita e punës: Drejtor Komercial.

Kompania: Kompania Rajonale Ujësjellësi "Mitrovica" Sh.A. në Mitrovicë.

Paga bazë: 991.25 Euro, sipas Rregullores mbi ndarjen e të ardhurave të KRU "Mitrovica".

Kushtet për punësim (edukimi i kërkuar):

Përgatitja profesionale: Titulli "Master", në drejtimet (Ekonomik, Menaxhment, Administrim Biznesi).

Përvoja e punës: Tri (3) vite përvojë pune, prej tyre së paku dy (2) vite punë menaxheriale

Pozita e hapur: Një (1) Drejtor Komercial.

Kushtet e veçanta:

- ✓ Njohuri të larta të raportimit të performancës dhe proceseve financiare/buxhetore,
- ✓ Të jetë shumë i orientuar drejt qëllimeve dhe zotëroj aftësi të shkëlqyera ndër personale dhe komunikuese,
- ✓ Aftësi të shkëlqyera organizative dhe udhëheqjes,
- ✓ Njohja e punës me kompjuter, programe softuerike (aplikacione) që funksionojnë në kuadër të Ndërmarrjes.

Detyrat dhe përgjegjësitë e punës:

- Të jetë i/e aftë që me orar të plotë dhe pa kufizime të kryej detyrat e punës,
- Drejton, organizon dhe zbaton punët dhe detyrat e caktuara në kompani në Departamentin Komercial si dhe të Marrëdhënies me konsumatorët dhe çështjet specifike (Faturimi, Inspektimi),
- Udhëheq dhe këshillon gjithë personelin vartës për të siguruar rezultate efektive,
- Drejton dhe përgatitë të dhënat komerciale të kompanisë për planin e biznesit,
- Shqyrton dhe aplikon procedurat e aprovuara për sektorin komercial,
- Koordinon, kontakton dhe bashkëpunon në ofrimin e të gjitha të dhënave të aktivitetit të departamentit në varësi,
- Analizon klimën e treguesve dhe tendencat e biznesit në aspektin komercial për të ndihmuar drejtuesit e lartë në krijimin e planeve strategjike për të ardhmen,
- Interpreton informacionin sektorial për të siguruar raportet e nevojshme për vendim-marrje,
- Monitoron procesin e faturimit dhe shitjeve, nivelin e performancës në njësit vartës, llogaritë e arkëtueshme,
- Sipas autorizimeve të KE-se përfaqëson Ndërmarrjen përpara palëve të interesit,
- Sipas kërkesave përpilon raporte mujore dhe vjetore për ARRU dhe institucione qeveritare,
- Është pjesë ndërlidhëse midis departamentit dhe njësitë e tjera,
- Kryen detyra të tjera, me ZKF-ne koordinon aktivitetet rreth mirëmbajtjes së llogarive të arkëtueshme dhe kryen detyra të caktuara nga Kryeshefi Ekzekutiv, sipas fushës së kompetencës dhe pozitës,
- Për punën që kryen i përgjigjet Kryeshefit Ekzekutiv.

Dokumentet e kërkuara:

Kandidatet e interesuar duhet të plotësojnë aplikacionin e Kompanisë dhe së bashku me këtë aplikacion të bashkangjesin edhe këto dokumente:

- CV-ja (Biografia),
- Letër motivimi,
- Diploma e Universitare (kopja e noterizuar, kurse diploma nga universiteti jashtë vendit duhet të jetë e nostrifikuar),
- Dëshmia nga gjykata kompetente që nuk është nën hetime, jo më të vjetër se 6 muaj,
- Dëshmitë e përgatitjes profesionale,
- Dëshmi mbi eksperiencën e punës,
- Një deklaratë nën betim (për pozitën: Drejtor Komercial).
- Kopja e letërnjoftimit.

Aplikacionet mund të merrën ueb-faqën e Kompanisë KRU "Mitrovica" Sh.A. në adresën: <http://www.kru-mitrovica.com/konkurset/>, si dhe në zyrën për burime njerëzore dhe të dorëzohen në të njëjtën zyrë së bashku me dokumentacionin përcjellës në formë fizike.

Konkursi do të jetë i hapur 15 ditë nga dita e publikimit nga data 12.01.2024 deri me datën 26.01.2024.

Aplikacionet e dorëzuara pas afatit të paraparë nuk pranohen, kurse ato të mangëta refuzohen.

Dokumentet e pranura të aplikantëve në fotokopje nuk kthehen.

Kompania Rajonale Ujësjellësi "Mitrovica" Sh.A. në Mitrovicë inkurajon kandidatet femra, kandidatet nga grupet minoritare si dhe personat me aftësi të kufizuar të aplikojnë.

KRU "Mitrovica" Sh.A. Mitrovicë.



MITROVICA
KOMPANIA UJËSJELLËSI RAJONAL SH.A.
REGIONAL WATER COMPANY J.S.C.
KOMPANIJA REGIONALNI VODOVOD D.D.

D A P

Departament za Administrativne Poslove

Mitrovica 12.01.24 Br 43

Na osnovu Administrativnog uputstva br. 07/2017, Regionalno vodovodno preduzeće "Mitrovica" d.d. u Mitrovici, objavljuje:

K O N K U R S

(Za popunjavanje radnih mesta probni rad u trajanju od šest (6) meseci, sa mogućnošću produženja)

I. Radno mesto: Komercijalni Direktor.

Kompanija: Regionalna Kompanija Vodovod „Mitrovica“ D.D. u Mitrovici.

Osnovna plata qe biće 991.25 Euro po uredbi o raspodeli prihoda.

Uslovi za zapošljavanje (potrebno obrazovanje)

Stručna sprema: Maester (Ekonomija, Menadžment, Poslovna Administracija)

Radno iskustvo: 3 godina radnog iskustva, od kojih najmanje 2 godine menadžerski

Otvorena pozicija: Jedan (1) Komercijalni Direktor.

posebni uslovi;

- ✓ Visoko poznavanje izveštavanja performanse i finansijskih/budžetskih procesa,
- ✓ Da bude veoma orijantisan ka cilju i imati odlične međuljudske komunikacijske veštine,
- ✓ Odlične organizacione i rukovodeće sposobnosti,
- ✓ Poznavanje rada sa kompjuterom, softverskim programima (aplikacije) koje funkcionišu u okviru Preduzeća.

Radne obaveze i odgovornosti:

- Da bude sposoban/na za obavljanje radnih obaveza sa punim radnim vremenom i bez ograničenja,
- Da usmerava, organizuje i realizuje poslove i zadatke u preduzeću u Sektoru Komercijale, kao i donose sa potrošačima i specifična pitanja (fakturisanje, inspekcija sa potrošačima),
- Da vodi i savetuje svo podređeno osoblje kako bi osigurali efektivne rezultate,
- Da upravlja i pripremi komercijalne podatke kompanije za poslovni plan,
- Da pregledai procenjuje odobrene procedure za komercijalni sektor,
- Da koordinira, kontaktira i sarađuje u pružanju svih podataka o aktivnostima pdrđenog odeljenja ,
- Da analizira komercijalnu klimu i poslovne trendove marketinških stručnjaka kao bi pomogli višim rukovodiocima u kreiranju strateških planova za budućnost,
- da tumači sektorske informacije kako bi obezbedio neophodne izveštaje za donošenje odluka,
- Da prati proces fakturisanja i prodaje, nivo učinka u podređenim jedinicama, potraživanjima,
- Da po ovlašćenjima EK zastupa Preduzeće pred zainteresovanim strankama,
- Da prema zahtevima izradi mesečne i godišnje izveštaje za ARRU i vladinih institucija,
- Da je deo za vezu između odeljenja i drugih jedinica,
- Da izvrši druge zadatke, sa ZKF koordinira aktivnosti oko održavanja potraživanja i da završi određene zadatke od strane glavnog Izvršnog Direktora, prema oblasti nadležnosti i položaja,
- Za poslove koje izvršava odgovara izvršnom Direktor.

Traženi dokumenti:

Zainteresovani kandidati moraju da popune prijavu Kompanije i da uz ovu prijavu prilože sledeću dokumentaciju:


- CV (biografija),
- Motivaciono pismo,
- Univerzitetska diploma (overena kopija, dok diplome sa univerziteta u inostranstvu moraju biti overene kod notara),
- Dokaz nadležnog suda koji nije pod istragom, koji važi najviše 6 meseci,
- Dokaz o stručnoj obuci,
- Dokaz o radnom iskustvu,
- Izjava pod zakletvom (za poziciju: komercijalni direktor).
- Kopija lične karte,

Prijave se primaju na sajtu Preduzeća RVP „Mitrovica“ d.d. na adresi <http://www.kru-mitrovica.com/konkurset/> kao i u kancelariji za ljudske resurse i dostavlja se istoj kancelariji zajedno sa pratećom dokumentacijom.

Konkurs će biti ovoren 15 dana od dana objavljivanja u sredstvima informisanja pocevsi od dana 12.01.2024 do 26.01.2024.

Prijave podnete nakon roka se ne prihvataju, a nepotpune se odbijaju.

Prihvaćena fotokopirana dokumenta podnosiocima prijava se ne vraćaju. Regionalno vodovodnopreduzeće „Mitrovica“ d.d. u Mitrovici podstiče kandidatkinje, kandidate iz manjinskih grupa, kao i osobe sa invaliditetom da se prijave. RVP „Mitrovica“ d.d. Mitrovica.



>> SHPALLJE TË VOGLA <<

- "Africa Balkans Trade And Culture Centre" SH.P.K. shpall të pavlefshme certifikatën e biznesit me nr. Unik Identifikues 811896911.

- Gëzim Kollçaku shpall të pavlefshme Diplomën e Fakultetit Juridik të UP-së, Prishtinë.

- Leutrim Berisha nga Gjakova shpall të pavlefshme diplomën e sh.m Ekonomike "Kadri Kusari" Gjakovë.

- Elvira Gojani nga Gjakova shpall të pavlefshme diplomë e sh.m. Mjekësisë " Hysni Zajmi" Gjakovë.

- Astrit Jusufi nga Gjakova shpall të pavlefshme diplomën e sh.m. Teknike "Nexhmedin Nixha" Gjakovë.

- Bledar Topalli nga Gjakova shpall të pavlefshme dëftesat e kl. I, II, III, IV dhe diplomën e sh.m. Teknike "Nexhmedin Nixha" Gjakovë.

- Lëshoj banesën me qira e cila gjendet prapa AAK-së me kushte të volitshme dhe po ashtu me çmim të volitshëm. Për informata më të hollësishme na kontaktoni në numrin e tel: viber +37744162783 dhe 049/900-994.

- Lëshoj banesën me qira ne lagjen Bregu i Diellit 2 te banesat e bardha, afër Shkollës Iliria banesa është dy dhomshe e mobiluar komplet, për info lajmërohuni në tel: 044/262-940 dhe 049/ 737-867.

- Lëshoj banesën me qira, e cila gjendet prapa AAK-së, me kushte të volitshme dhe po ashtu me çmim të volitshëm.

- Për informata më të hollësishme na kontaktoni në numrin e telefonit: 044-162-783.

- Lëshohet banesa me qira ne qendër të Prishtinës afër Sheshit Zahir Pajaziti, banesa është dy dhomshe e mobiluar, lëshohet me qira prej 1 qershori deri me 1 gusht (dy muaj), çmimi sipas marrëveshjes. Për informata në tel. 044/171-328.

- Lëshoj banesën e re me qera në qendër prapa teatrit Kombëtar, me sipërfaqe prej: 60 m2. Banesa ka një dhomë gjumi, sallon dhe kuzhinë. Ka të gjitha pajisjet. Çmimi: 300 Euro. Banesa lëshohet për afate të gjata dhe të shkurtra. Informata në tel: 049\44-888-801 (viber)

